



ATASSUT

Steen Lyngø

UKA 2015/26

27.11.2015

Meeqqanut kinguaassiutitigut kanngutsaattuliortarneq ullumimut naleqqiullugu annertuumik appartinniarlugu pitsaaliuinerup paasiniaasarnerillu nukittorsarnissaat pillugu apeqquteqaat allaavigalugu oqallinnissamik siunnersuut.

(Inatsisartunut ilaasortaq Tillie Martinussen, Demokraatit)

Aallarniutigalugu ATASSUT-mit Demokraatit sinnerlugit Inatsisartunut ilaasortaq Tillie Martinussen qutsavigissavarput apeqquteqaat aallaavigalugu oqallinnissamik siunnersuummik imartuumik saqqummiussaqaqarneranut, tamannalu imatut ATASSUT-mit oqaaseqarfigissavarput:

Siunnersuuteqartup matumani meeqqat kinguaassiutitigut kanngutsaattuliorfigineqartartut sumiginnarneqartartullu pillugit pitsaanagerusumik annertunerusumillu ikiorsiiffiginiarneqarnissaanut suliniutit pitsanngorsarneqarnissaanik ujartuina ATASSUT-mit paasilluarsinnaavarput.

ATASSUT-mit isumaqarpugut sumiluunniit meeraq kinguaassiutitigut kanngutsaattuliorfigitinneqartoq ilisimagaanni piaarnerpaamik qisuariartoqartariaqarpoq – tassuunatigut ATASSUT-mit isumaqarpugut sumiiffinni SSSPK-ni suleqatigiinnerit nukittorsarneqartariaqartut. ATASSUT-mit takusinnaasavut naapertorlugit sineriammi pisaariaqartinneqarput, susassaqaqfinni sulisut ataasiakkaat pisussaaffiit suunerinik erseqqissaavigineqarnissaat aammalu sullissinerminni atorluarsinnaasaminnik sakkussilluarneqarnissaat, suliniutillu aamma ataqatigiissarluarneqarnissaat pisariaqartut ilagilluinnarpaat.

Taamaattumik ATASSUT-mit Naalakkersuisunut kaammattuutigerusupparput Kommunit suleqatiginerini erseqqissumik paasiniarneqassasut suutigut nalunaartoqarnermiit iliuuseqarnissap tungaanut periaatsit pitsanngorsaavigineqarsinnaaneri pillugit iliuusissanik ujartuissasut.

Siunnersuuteqartup nammineq ilaatigut taakkartorpai qaammarsaanerit ingerlanneqarsinnaasut, aammalu ilanngullu aamma eqqaallugu nalunaartoqarsimatillugu pisortat qisuariaateqartarsimanginneri marloriaammik sumiginnaanerup pilertarnera. Taamaattumik ATASSUT-mit isumaqarpugut pingaaruteqarluinnartoq suliniutit ataqatigiilluinnarnissaat –



qaammarsaaneq ingerlanneqassappat – taava aamma naatsorsuutigineqarsinnaavoq tamatumap kingunerisaani nalunaartartut amerleriaateqarsinnaasut, taamaattumillu nalunaarfigineqarsinnaasut ilisimaqqissaartariaqarpaat iliuussissatut periarfissat suusinnaaneri.

ATASSUT-mit isumaqarpugut aamma immikkut suliniuteqarnissami qitiusumiit ilisimasaniq, ikorfartuinermik, ataqatigiissarinermillu ingerlatsiviit Saaffittut, Illinertut, MIO-tut ittut allallumi ingerlanneqalereersimasut pisariaqartut.

ATASSUT-mit manna ilanngullugu oqariartuutigerusupparput ATASSUT-mit qangaaniilli pingaartitarigatsigu arlaatigut annertuunik inuiaqatigiinni alloriarnernik pisoqarniartillugu partiit ataatsimoorlutik isumaqatigiissuteqarsinnaaneri – Inatsisartut ataatsimiittarfianiinnaanngitsoq, ulluinnarnili sulinitanni politikikkut suleriaasitsinni isumaqatiginniartarnerit atornerulertariaqarpavut, tassuunakkut siunnerfeqatigiilluta ukiunut amerlanerusunut aammalu siunissamut ungasinnerusumut isigaluta suliniuteqarnissatsinnut aqqutissaalluarmat – tamanna meerartatta inuusuttortattalu pingaarnertut pisariaqartippaat allannguajaatumik aalajaatumillu ikorfartorneqarnissaq.

Naggasiullugu ATASSUT-mit oqaatigissavarput Naalakkersuisut suliniutit ingerlaalereersimasut taakkartugai assut iluarisimaarnartutut nalileratsigit, neriuppugulli sulii ukiuni arlalippassuarni taamatut sulianik ingerlatsineq attatiinneqassasoq.

Taamatut naatsumik ATASSUT-mit oqaaseqarluta kingumut siunnersuuteqartoq qutsavigissavarput taama pingaarutilimmik oqallinnissamut siunnersuuteqarmat, taamaammatt aamma ATASSUT-mit Inatsisartut oqaaseqaatissaatut siunnersuut taperserparput.